

1 Jon

Mu-ngoyurra Gu-jerrmarra Janguny

(1 John)

An-gata Minypa Wengga Rrapa Wanngu An-gunega

¹ An-gata minypa mu-ngoyurra ay-ninyarropa ay-workiya, an-gatiya minypa ngayburrrpa nyiburr-gunaga nyiburr-galiyana nula rrapa nyiburr-mipila nyibu-buna minypa nyibi-nana rrapa wugupa nyiburr-rrigirrgarra nyiburr-workiyana, nipiya ngayburrrpa nyibu-ngurrjinga nyiburr-workiya minypa nipa an-nardiya Wengga wanngu gun-gunega an-gurrimapa.[◊]

² Nipiya wanngu an-gurrimapa a-bena arrburrwa, ngayburrrpa nyibi-nana rrapa marn.gi nyiburr-ni nula minypa nipiya an-burrall. Like nipa ngayburrrpa nyibu-ngurrjinga ana-gorrburrrwa nyiburr-workiya, ngardawa nipiya wanngu an-gurrimapa Nyanyapa arrku wugupa abirri-ni abirri-workiyana rrapa barrwa a-bena arrburrwa ngayburrrpa.[◊]

³ Like nyibu-ngurrjinga ana-gorrburrrwa nyiburr-workiya an-gatiya ngayburrrpa nyibi-nana rrapa nyiburr-galiyana nula, gu-gurda ngacha. Barra minypa gu-ngardapiya arrburrwa ana-goyburrrpa rrapa ngayburrrpa, minypa

[◊] **1:1** Jon 1:1 [◊] **1:2** Jon 1:14

Nyanyapa arrku wugupa arrburrwa rrapa annigipa An-walkurpa Jesus Christ nipiya burrguta.

⁴ Rrapa gun-guna janguny ngayburrpa nyiburr-wukurrjinga ana-gorrburra barra minypa ana-goyburrpa nyibu-borrwa nyiburr-bamba rrapa ngayburrpa nyiburr-guna minypa nyiburr-marrkapcha barra nyiburr-ni burrguya.

Ngarripa Arr-yinmiya Barra Minypa Gu-gujayanaya Arr-ninya

⁵ Janguny gun-gata ngayburrpa nyiburr-galiyana nula An-walkurpa a-wena arrburrwa rrapa minypa gun-guniya gugu nyibu-ngurrja barra ana-gorrburra, nipa janguny gun-guna: Wangarr nipa an-gujayanaya, rrapa gala gunnga ana-munya gu-ji nula; wurra jarra nipa an-gujayanaya wupa.

⁶ Rrapa ngarripa minyja arr-ngurrjiya jimarna Wangarr wugupa arrkula, wurra minypa burdak an-munya wupa arr-nirra, gun-narda minypa arr-yolkiya arr-weya rrapa gun-burrall janguny gala ay-borrwa arr-bamba, wurra gun-nyagara.

⁷ Wurra minyja gu-gujayanaya arr-nirra minypa nipa Wangarr a-jayanayarra a-nirra, lika ngarripa jal arr-nirra arrkula gu-gapa gu-guta, rrapa Jesus an-gata an-nigipa An-walkurpa mun-nigipa maningan arr-weparda mu-nirra gun-nga gun-nerra ay-rrimarra.

⁸ Wurra ngarripa minyja arr-ngurrjiya jimarna ngarripa wupa arr-molamola gala gun-nga gun-nerra ay-rrima rraka nipa arr-wepa, gun-narda

minypa ngarripa arr-yolkiya arr-nirra; gala gun-nга gun-burral ay-rrimangarna.

⁹ Wurra jarra gun-gata minypa ngarripa werra arr-negiyana, minyja gun-narda nula arr-ngurrjiya nula Wangarr minypa ngarripa arr-werra, nipa gala a-yinmiya a-bamapa nipa gochila an-dana; wurra jarra minypa nipa jawurrga a-jirra an-molamola nipa baywarra gu-nega barra arrkula ngarripa arr-yinmiyana werra arr-negiyana arr-workiyana, rrapa minypa arr-wepa barra gun-nга gun-nerra ay-rrimarra.

¹⁰ Wurra ngarripa minyja arr-ngurrjiya jimaarna gala gun-nга werra arr-negiyarna arr-workiyarna, gun-narda minypa Wangarr ay-ngurrjinga an-guyolkiya rrapa minypa gun-nigipa janguny ngarripa gala ay-rrima nula, wurra gun-nyagara. Ngardawa Wangarr jarra a-ngurrjinga an-gugaliya an-nerra.

2

Jesus Christ An-ngarripa An-gugunggaja

¹ Nyiburr-gurda nyiburr-ngaypa gu-ngarda yerrcha, japurra ngapa nyiburr-jirra, gun-narda ngu-wukurrjinga ana-gorrburra barra minypa gala mola gun-nга werra nyiburr-negiya. Wurra minyja nginyipa ny-yinga ny-jata werra nyi-negiyan, ngarripa jarra ay-rrimanga an-gugunggaja Nyanyapa arrku a-wengganacha arrkula a-workiya — nipiya an-gata Jesus Christ Jechinuwa Ay-nirrapa Ay-workiya.

² Ngardawa nipiya Jesus Christ ana-nyala arrorringa arrkula mari minypa ngarripa arr-guna ngardapa ngika, wurra jarra warlaman arr-gurdiya gorlk.

³ Rrapa ngarripa marn.gi minypa gun-burrall ngarripa gipa marn.gi arr-ni nula Wangarr minypa gun-nigipa joborr gun-guyinda ngarripa ay-borrwuja nula arr-bamburda, gu-gurda ngacha.

⁴ Wurra minyja ana-nga a-wengga, a-yinda, "Ngaypa marn.gi nula," wurra jarra an-gata gala jama a-ji minypa nipa Wangarr a-wena, nipa an-gata an-gugaliya ngardawa an-guyolkiya; gala gun-nga gun-burrall nipa gu-rrima.

⁵ Wurra an-nerranga ana-nga minypa gu-borrwuja nula a-workiya gun-nigipa wengga, ana-gata ngacha an-gugaliya warrpam gurrurta gu-rrimanga Wangarr gun-nika. Rrapa gu-gurda ngacha minypa ngarripa marn.gi gipa ngarripa arr-guna nipa an-gatiya Wangarr.

⁶ Ana-nga a-weya a-workiya jimarna nipa rrapa Wangarr gu-ngardapa abirri-negiyana, wurra nipa an-gata an-gugaliya a-yinda barra a-ni a-workiya minypa Christ a-ni a-workiyana.

Gun-geka Joborr

⁷ Japurra ngapa nyiburr-jirra, gun-guna joborr ngaypa ngu-wukurrjinga ana-gorrburra gun-geka ngika, wurra jarra gun-guwarr; gipa mu-ngoyurra ana-goyburrpa nyibi-rrimarra nyiburni. Gun-gunaga gun-guwarr janguny gipa ana-goyburrpa marn.gi. [✳]

[✳] 2:7 Jon 13:34

8 Wurpa lika ngu-wukurrjinga ana-gorrburrwa minypa joborr gun-geka jarra. Ngardawa nipa Jesus Christ arr-gurdagurdarraj a-nirra meyali, rrapa ana-goyburrpa niya yarlanga nyibi-nenga meyali. Ngardawa ana-munya gu-wulebiya gu-boya, minypa gun-burrall gun-gujayanaya gipa gugu gu-jayanayarra gu-jirra.

9 Wurra ana-nga a-ngurrjiya a-workiya jimaarna gu-gujayanaya a-nirra, wurra minypa nipiya ana-nyala gala jal a-ni nula an-nigipa an-borrmunga an-guyinda, gun-narda minypa angata an-gugaliya burdak ana-munya a-nirra.

10 Wurra ana-nga minypa gurrurta gu-rrimanga nula an-nigipa an-borrmunga an-guyinda, an-gata an-gugaliya gu-gujayanaya a-ninyarra rrapa minypa gala gun-nga gun-gulijiwarriya gu-rrima.

11 Wurra an-gata minypa gala jal a-ni nula an-nigipa an-borrmunga an-guyinda, nipa angata an-gugaliya ana-munya a-ninyarra rrapa arrigirrgnga a-workiya; gala marn.gi ay-yinda ay-bamburda; ngardawa gapula a-negarra gun-gata ana-munya.

12 A-lay, gu-ngarda yellcha, japurra ngapa nyiburr-jirra,
ngaypa ngu-wukurrjinga ana-gorrburrwa
ngardawa Wangarr baywarra gu-negarra
ana-gorrburrwa gun-nerra nyibi-rrimarra,
ngardawa minypa Jesus Christ a-rorrchinga
ana-gorrburrwa.

13 A-lay, mu-murna yellcha, ngaypa ngu-wukurrjinga ana-gorrburrwa

ngardawa ana-goyburrpa gipa marn.gi
 nyiburr-ni nula an-gata mu-ngoyurra
 ay-ninyarrapa ay-workiya.

A-lay, yawarriny yellcha, ngaypa ngu-wukurrjinga ana-gorrburrwa
 ngardawa ana-goyburrpa gipa nyiburr-molamiyana;
 an-gata walkwalk gun-nerra an-gurrimapa, nipa an-nyagara.

¹⁴ A-lay, gu-ngarda yellcha, japurra ngapa nyiburr-jirra,
 ngaypa ngu-wukurrjinga ana-gorrburrwa
 ngardawa Nyanyapa arrku ana-goyburrpa
 gipa marn.gi nyiburr-ni nula.

A-lay, mu-murna yellcha, ngaypa ngu-wukurrjinga ana-gorrburrwa
 ngardawa gipa marn.gi nyiburr-ni nula
 an-gata mu-ngoyurra ay-ninyarrapa ay-workiya.

A-lay, yawarriny yellcha, ngaypa ngu-wukurrjinga ana-gorrburrwa
 ngardawa ana-goyburrpa gipa derta nyiburr-negiyana,
 rrapa minypa Wangarr gun-nika janguny nyibi-rrimanga nyiburr-nirra,
 rrapa minypa nyiburr-molamiyana;
 an-gata walkwalk gun-nerra an-gurrimapa, nipa an-nyagara.

¹⁵ Gala barra jal nyiburr-ni gun-guna rrawa
 rrapa minypa gun-nga burr-guta gu-gurdinya gu-yika gu-rrawa. Wurra an-gata ana-nga minyja
 gun-guna rrawa jal a-nirra, nipa ngardawa gala jal a-ni nula Wangarr.

¹⁶ Ngardawa gu-gurdiya gu-yika gu-rrawa — minypa gun-nerra an-gugaliya jal a-nirra a-workiya, rrapa minypa gun-nga burr-guta nipa gu-nacha a-workiya rrapa jal a-nirra barra gu-ma, rrapa minypa a-yinmiya a-workiya nipa wana a-negiya — gu-gurda ngacha Wangarr nyanma ngika; jarra gu-gurdiya gu-yika gu-rrawa.

¹⁷ Minyja bubu-borrwa: Gun-guna rrawa rrapa gun-nga burr-guta minypa an-gugaliya jal a-nirra a-workiya, gu-gurda ngacha gu-boy barra, rrawa burr-guta. Wurra ana-nga an-gugaliya jama a-jirra a-workiya Wangarr gun-nika jal gun-guni, nipa jarra wanngu a-nirrapa a-workiya.

An-jaranga An-gata An-bachirra Nula Christ

¹⁸ Japurra ngapa nyiburr-jirra, nyiburr-gurda nyiburr-ngaypa gu-ngarda yerrcha, gun-guniya gugu yi-gurrepa gu-jirra gu-bamburda gun-gumungba. Minypa ana-goyburrpa marn.gi an-gata an-bachirra nula Christ a-bengga barra, wurra gun-guniya gugu nipa a-beyapa a-yurra an-jaranga, ngarla, an-bachirra nula Christ. Gu-gurda ngacha minypa ngayburrpa marn.gi yi-gurrepa gu-jirra gu-bamburda nipiya Christ ana-jeka barra.

¹⁹ Aburr-gata minypa aburr-bachirra nula Christ, birripa jarra mu-ngoyurra aburr-mulpiyana arrburrwa ngayburrpa, wurra barrwa arrbu-bawuna. Ngardawa gala gu-ngardapa arrburrwa birripa rrapa ngayburrpa. Minyja jimarn jarra gu-ngardapa arrburrwa, nguburr-ninyarrarna. Wurra arrbu-bawuna.

Lika yarlanga gu-yurra minypa birripa gala gu-ngardapa arrburrwa.

20 Wurra ana-goyburrpa jarra nipa Christ ana-jerrmiyana ana-gorrburrwa Mern An-mawunga, lika nyiburr-gurdiya warrpam marn.gi nyiburr-ni gun-burral janguny.

21 Ngaypa ngu-wukurrjinga ana-gorrburrwa ngu-nirra, gun-narda ngika minypa jimarn jarra ana-goyburrpa gala marn.gi gun-burral janguny. Wurra minypa ana-goyburrpa marn.gi gun-gata, rrapa minypa ana-goyburrpa marn.gi gala gun-ga gu-ngardapa butula gun-guyolkiya rrapa gun-burral.

22 Lika an-an.gaya an-guyolkiya, a-lay? Wurra an-gata, ngaja, ngarla, minypa a-weya a-workiya jimarna Jesus nipa ngika Christ an-gata Wan-garr a-menga arrburrwa. Ana-gatiya ngacha an-gugaliya an-bachirra nula Christ. Minypa ngoyurra a-yerryerrmiyana butula gu-ngardapa nipa Nyanyapa arrku rrapa nipa an-gata An-walkurpa.

23 Ngardawa ana-nга minypa ngoyurra a-yerryerrmiya nula An-walkurpa, an-gata an-gugaliya ngardawa gala a-rrima Nyanyapa arrku. Wurra ana-nга minypa marr a-balcharra nula An-walkurpa, an-gata an-gugaliya nipa ngardawa a-rrimanga An-walkurpa rrapa Nyanyapa arrku burr-guta.

24 Buburr-jarlapiya. Mu-nguy bubi-rrimapа janguny mu-ngoyurra marn.gi nyiburr-ni. Minja ana-goyburrpa nyiburr-yirda nyibuborrwapa nyiburr-bamba, gun-narda minypa

ana-goyburrpa rrapa bitipa An-walkurpa An-jirrpungapa gu-ngardapa nyiburr-negiyapa barra nyiburr-workiya.

²⁵ Rrapa gun-guna minypa nipa Christ gochila an-dana: Wanngu nguburr-nipa barra nguburr-workiya, ngaja, ngarla.

²⁶ Gun-gata ngu-wukurrjinga ana-gorrburra wa rrapa nguburr-ngurrjinga ana-gorrburra wa aburr-gata minypa aburr-ngunyangunyijiya aburr-workiya, jimarna nyirrbu-warga rrapa minypa ana-goyburrpa nyiburr-lijiwarriya,

²⁷ wurra ana-goyburrpa jarra Mern An-mawunga nyibi-rrimanga nipa Christ ana-jerrmiyana ana-gorrburra wa. Nipa Mern An-mawunga wugupa ana-gorrburra wa nyiburr-ninyarrapa, rraka gala nyiburr-yinmiya an-nerranga nyiburr-wechawecha nula marn.gi an-gunega. Ngika. Wurra jarra nipa Mern An-mawunga nyirr-guybukaja gun-bulapalawa. Rrapa gun-nga gun-gata minypa nipa nyirr-guybukaja, gun-narda gun-burral; gun-guyolkiya ngika. Ganapiya, lika bubi-yagurrma nula Mern An-mawunga gun-nigipa janguny, rrapa minypa mu-nguy gu-ngardapa nyiburr-negiyapa barra nyiburr-workiya ana-goyburrpa rrapa nipa Christ.

²⁸ Ngaw, japurra ngapa nyiburr-jirra, mu-nguy gu-ngardapa nyiburr-negiyapa nyiburr-workiya ana-goyburrpa rrapa nipa Christ. Barra gun-gata waypa an-burral ana-jeka, ngayburrpa nguburr-molamola nguburr-ni barra nula, minypa gala gona nguburr-ni nula nipa ana-jekapa, wurra gun-nyagara.

²⁹ Rrapa minypa nipa an-gata ana-goyburrrpa marn.gi nula Christ minypa nipa jechinuwa a-nirrapa a-workiya, gun-narda minypa ana-goyburrrpa barra nyibu-borrwa nula an-gugaliya an-guyinda minypa gun-guna: Ana-nга minypa jechinuwa a-nirra a-workiya, an-gata an-gugaliya ngardawa nipa niya Wangarr an-nika minypa an-gata Christ.

3

Wangarr Burr-yika Gu-ngarda Yerrcha

¹ Minyja, a-lay, bubu-borrwa nipa Nyanyapa arrku a-yinmiyana burr-guya gurrurta gu-rrimarra arrburrwa wana, minypa nguburr-yigipa arr-negarra Wangarr nguburr-yika gu-ngarda yerrcha. Rrapa ngayburrrpa gun-burrall nguburr-yinagatiya nguburr-nirra Wangarr nguburr-yika gu-ngarda yerrcha. Gu-gurda nula gu-guna burr-yika gu-rrawa gala marn.gi arrburrwa, ngardawa gala marn.gi aburr-nirrarna nula Wangarr.[✳]

² Japurra ngapa nyiburr-jirra, gun-guniya gugu ngayburrrpa Wangarr nguburr-yika gu-ngarda yerrcha, wurra gala yarlanga gu-yu burdak gun-gata nguburr-guyinmiya barra nguburr-ni. Jarra ngayburrrpa marn.gi minypa nuwurra waypa barra Christ a-bengga, ngayburrrpa nguburr-ni barra minypa nipa, ngardawa ngubi-na barra nipiya an-guyinmiya.

[✳] 3:1 Jon 1:12

³ Rrapa ana-nга an-jaranga minypа gu-gurda ngacha marrnguwa a-nirra rrapa a-nyiljinga a-bamburda, nipa minypа a-jarlapiya a-workiya, barra minypа an-molamola a-ni minypа nipa Christ a-nirra an-molamola, gala gun-nга gun-nerra gu-rrima.

⁴ Wurra ana-nга an-gata minypа werra a-negiya a-workiya, nipa an-mornanga; joborr gu-rrumurra Wangarr gun-nika. Ngardawa gun-gata gun-nerra nipa joborr gun-gurruma, ngaja, ngarla.

⁵ Wurra ana-goyburrpa marn.gi minypа Christ a-bena gun-nerra barra gu-yerrnya arrburrwa, rrapa minypа nipa gala gun-nга gu-rrima gun-nerra.[◊]

⁶ Rrapa gun-narda minypа gala ana-nга mun-guy werra a-negiya a-workiya minypа nipa rrapa Christ gu-ngardapa abirri-negiyana; wurra gala a-yinmiya. Wurra an-gugaliya an-gata minypа werra a-negiya a-workiya, nipa jarra gala a-nacharna rrapa gala marn.gi nula Christ; wurra gun-nyagara.

⁷ Ana-goyburrpa nyiburr-gurda nyiburr-nyaypa gu-ngarda yellcha, buburr-jarlapiya, japurra ngapa nyiburr-jirra. Gala yapa ana-werranga nyirr-yolkajin, nyiburr-lijiwarriyan. Wurra ana-nга minypа gun-jechinuwa jama a-jirra a-workiya, an-gata ngardawa jechinuwa a-nirra nula Wangarr gun-maywapa minypа nipa Christ jechinuwa a-nirra nula.

⁸ Wurra an-nerranga ana-nга minypа werra a-negiya a-workiya, nipa jarra walkwalk nyanma

[◊] 3:5 Jon 1:29

an-gata gun-nerra an-gurrimapa. Ngardawa angatiya walkwalk, nipa werra ay-negiyapa ay-nirrapa ay-workiya. Minyjiya. Gun-narda nula nipa an-gata Wangarr an-nika An-walkurpa ana-bona: Barra minypa niipiya An-walkurpa ananyaala gu-rruma nula walkwalk gun-nika jama gun-gata minypa niipiya walkwalk jama a-jirra a-workiya gun-nerra.

⁹ Wurra ana-nга an-gata an-gugaliya Wangarr an-nika an-gungarda, nipa gala a-yinmiya mu-nguy werra a-negiya a-workiya. Ngika. Jarra Wangarr an-ngurrnga an-gata niipiya an-gugaliya an-gunaga. Gala a-yinmiya mu-nguy werra a-negiya a-workiya, wurra jarra Wangarr an-nika.

¹⁰ Gu-gurda ngacha minypa ngarripa marn.gi burrwa Wangarr burr-yika gu-ngarda yerrcha minypa aburr-nга aburr-gata, rrapa walkwalk burr-yika gu-ngarda yerrcha aburr-nга aburr-gata. Minypa ana-nга an-gata gala gun-jechinuwa jama a-ji a-workiya, rrapa gala gur-rurta gu-rrima nula an-nigipa an-borrmunga an-guyinda, an-gata an-gugaliya nipa ngardawa gala Wangarr an-nika.

Gurrurta Ngubi-rrima Barra Arrburrwa Gu-gapa Gu-guta

¹¹ Janguny gun-gata ana-goyburrpa mu-nгоуrrа nyiburr-galiyana, nipa minypa gun-guna: Ngayburrpa barra gurrurta ngubi-rrima barra arrburrwa gu-gapa gu-guta.[◊]

[◊] 3:11 Jon 13:34

¹² Wurra gala barra jama nguburr-ji minypa an-gata Geyin (Cain). Nipa jawina a-ni nula walk-walk an-gata gun-nerra an-gurrimapa, lika nipa Geyin ana-nyala an-nigipa worlapa niya a-buna, an-molamola an-gata a-juwuna. Wurra nipa Geyin an-nga nula a-buna, ya? Wurra nipiya ngardawa gala jal a-nirrarna nula an-nigipa worlapa niya, gu-gurdiya ngacha. Ngardawa an-nigipa worlapa niya gun-jechinuwa jama a-ji a-workiyana, wurra nipa jarra Geyin gun-nerra jama a-ji a-workiyana.[◊]

¹³ Ganapiya, lika minyja gu-guna burr-yika gu-rrawa ngoyurra aburr-yerryerrmiyan ana-gorrburrwa, gun-narda gala barra gochila nyiburr-barrja.

¹⁴ Wurra jarra ngayburrpa marn.gi gipa ngubu-bawuna gun-gujuwa, lika nguburr-jurrwurra gu-gatiya wenga aa wanngu gun-guni, ngardawa minypa gurrurta ngubi-rrimanga arrburrwa gu-gapa gu-guta, gu-gurda ngacha. Wurra ana-nga an-gata gala nipa gurrurta gu-rrima, an-narda ngardawa gu-gujuwa wupa a-ninyarra.[◊]

¹⁵ Minypa ana-nga an-gata ngoyurra a-yerryerrmiya nula an-nigipa an-borrmunga, nipa an-gata an-gubu ngacha, ngardawa ngoyurra a-yerryerrmiya nula an-nigipa an-borrmunga. Rrapa ana-goyburrpa marn.gi an-gubu an-guyinda gala wanngu gun-guni gu-rrima.

¹⁶ Rrapa gun-guna wupa ngayburrpa marn.gi gurrurta gun-gurrima gun-gata gun-ngiya

[◊] 3:12 Genesis 4:8 [◊] 3:14 Jon 5:24

minypa: Minypa Christ nipa wupa an-murna a-barrbiyana, a-juwuna arrburrrwa ngayburrrpa nguburr-marr, gu-gurda ngacha. Rrapa ngayburrrpa rrapa nguburr-yinarda barra — nawanawa nguburr-ni barra aburr-ngayburrrpa worlapa arrburrrwa yellcha birripa burrwa nguburr-juwa.

¹⁷ Wurra ana-nga an-gata minypa gorlk murrimanga, minya nipa a-na an-nigipa an-borrmunga an-nyagara, wurra wurpa gala agunggaja nula, an-gata an-gugaliya gala a-yinmiya a-ngurrijiya jimarna nipa jal a-ni nula Wangarr. Wurra gun-nyagara.

¹⁸ Japurra ngapa nyiburr-jirra, nyiburr-gurda nyiburr-ngaypa gu-ngarda yellcha, ngayburrrpa gala nguburr-yinmiya minypa ngana nguburr-jirra wupa nguburr-wengga jimarna gurrurta ngubi-rrimanga arrburrrwa gu-gapa gu-guta. Ngika. Wurra gun-burral gurrurta ngubi-rrima barra arrburrrwa jarra, minypa nguburr-gunggachichiya barra nguburr-workiya.

*Nguburr-yinmiya Barra Nguburr-molamola
Nguburr-ni Barra Nula Wangarr*

¹⁹ Minya nguburr-yirda nguburr-gunggachichiya nguburr-workiya rrapa gun-burral gurrurta ngubi-rrima arrburrrwa gu-gapa gu-guta, gu-gurda ngacha minypa ngayburrrpa marn.gi arrburrrwa minypa ngayburrrpa ngubi-rrimanga gun-burral janguny, rrapa minypa nguburr-molamola nguburr-nirra nula Wangarr nipa arr-nacha a-nirra,

20 wuriya minypa wuparnana nguburr-galiyarra arrburrwa minypa nguburr-werra. Ngardawa Wangarr nipa wana; gun-gata wuparnana nguburr-galiyarra arrburrwa gun-narda gun-delipa. Wurra Wangarr nipa jarra marn.gi gun-bulapalawa.

21 Japurra ngapa nyiburr-jirra. Minyja gala gun-nga wuparnana nguburr-galiya arrburrwa nguburr-werra, gun-narda minypa nguburr-molamola nguburr-nirra nula Wangarr,

22 rrapa gun-nga minypa nguburr-ngiwijarra nula, gun-narda ngubu-mangga nguburr-workiya nipa arr-wucha. Ngardawa gun-nigipa joborr gun-guyinda ngayburrpa ngubu-borrwuja nula nguburr-bamburda, rrapa gun-nga minypa nipa jal a-nirra ngayburrpa jama nguburr-jirra nguburr-workiya, gu-gurda ngacha.

23 Rrapa nipa Wangarr gun-nika joborr minypa gun-guna: An-nigipa Walkur Jesus Christ ngayburrpa marr nguburr-balcha barra nula nipa an-nelangga, rrapa gurrurta ngubi-rrima barra arrburrwa nguburr-ni gu-gapa gu-guta minypa nipa an-gata An-walkurpa a-wena.◊

24 Gu-gurda ngacha joborr Wangarr gun-nika. Rrapa nguburr-nga nguburr-gata minypa gun-nigipa joborr ngubu-borrwuja nula nguburr-bamburda, gun-narda minypa ngayburrpa nguburr-guna nipa an-gata Wangarr, rrapa nipa an-gatiya Wangarr ngayburrpa nguburr-guna. Rrapa gun-guna minypa ngayburrpa marn.gi nipa an-gata Wangarr ngayburrpa

◊ 3:23 Jon 13:34; 15:12,17

nguburr-guna, ngardawa nipa An-mawunga
ngubi-rrimanga nipa arr-wuna.

4

An-mawunga An-guyinda An-burral Rrapa An-guyolkiya

¹ Japurra ngapa nyiburr-jirra, buburr-jarlapiya. Aburr-werranga aburr-gata aburr-ngurrjiya jimarna Wangarr An-mawunga abi-rrimanga, wurra ana-goyburrpa gala barra nyiburr-yurtchapa marr nyiburr-balcha burrwa. Ngika. Wurra burdak nyiburr-ngunyangunyjiya barra burrwa minyja an-gata abi-rrimanga nipa Wangarr nyanma, waygaji gun-nyagara. Ngardawa gun-nardiya rrawa gu-jirra gu-boya an-jaranga a-boya a-workiya an-guyolkiya an-guyinda an-mujaruk.

² Wurra ana-goyburrpa nyibi-na barra nula an-gata minyja Wangarr An-mawunga a-rrimanga o an-nyagara. Ngardawa ana-nга minypа a-ngurrjingа Jesus Christ, minypа nipa ana-bupiyana, an-gugaliya a-ni an-ngayburrpa Wangnu An-gunega, an-gata an-gugaliya ngardawa a-rrimanga Mern An-mawunga Wangarr nyanma.

³ Wurra ana-nга an-gata gala a-yirdа marr a-balcha nula Jesus, an-gata an-gugaliya gala Wangarr nyanma An-mawunga a-rrima, wurra ngika. Wurra jarra a-rrimanga an-mawunga an-gata an-bachirra nula Christ, an-mawunga an-gata ana-goyburrpa gipa nyiburr-galiyana rrapa marn.gi nyiburr-ni minypа nipa ana-boy

barra ay-ngunyuna; jarra gipa gugu a-benapa a-ninyarra.

⁴ Wurra, japurra ngapa nyiburr-jirra, nyiburr-gurda nyiburr-ngayapa gu-ngarda yerrcha ana-goyburrpa Wangarr nyiburr-yika. Rrapa aburr-gata aburr-guyolkiya aburr-guyinda aburr-mujaruk ana-goyburrpa nyiburr-molamiyana, birripa aburr-nyagara. Ngardawa An-mawunga ana-goyburrpa nyibi-rrimanga nipa wana anbabalapa, wurra gu-gurda burr-yika gu-rrawa abi-rrimanga nipa jarra marr a-yinaga.

⁵ Aburr-gata aburr-guyolkiya aburr-guyinda aburr-mujaruk, birripa gu-gurdinya burr-yika gu-rrawa, rrapa janguny birripa aburr-weya aburr-workiya gu-gurdinya gu-yika gu-rrawa. Gu-gurda ngacha minypa wurra gama gorlk jiny-jaliyarra a-galiyarra burrwa a-workiya jiny-yorkiya, ngardawa birripa niya gu-gurdinya burr-yika gu-rrawa.

⁶ Wurra ngayburrpa jarra nyiburr-guna Wangarr nyiburr-yika nyiburr-mujaruk, rrapa ana-nга minypа marn.gi a-ni nula Wangarr, an-gata an-gugaliya a-galiyarra arrburrwa a-workiya ngayburrpa. Wurra an-nerranga ana-nga nipa Wangarr nyanma ngika, an-gata an-gugaliya gala a-galiya arrburrwa a-workiya, wurra gunnyagara. Rrapa gu-gurda ngacha wupa lika ngayburrpa marn.gi nguburr-ni barra burrwa ana-nga an-mawunga abi-rrimanga, minyja gun-burral an-gurrimapa wurra waygaji an-guyolkiya.

Wangarr Nipa Gurrurta An-gurrimapa

7 Japurra ngapa nyiburr-jirra. Ngayburrpaa barra gurrurta ngubi-rrima barra arrburrwa gu-gapa gu-guta. Ngardawa gurrurta gun-gurrima nipa gun-gata Wangarr nyanma, rrapa aburr-nga aburr-gata minypa gurrurta gubi-rrimanga burrwa gu-gapa gu-guta, birripa ngardawa Wangarr nyanma rrapa minypa marn.gi aburr-nirra nula aburr-bamburda nipa Wangarr.

8 Wurra ana-nга an-gata gala gurrurta gu-rrima, nipa ngardawa gala marn.gi a-nirrarna nula Wangarr. Ngardawa Wangarr nipiya gurrurta an-gurrimapa.

9 Rrapa Wangarr arr-gurdagurdarrana nipa gurrurta gu-rrimanga arrburrwa minypa gun-gunaga: Minypa an-nigipa Walkur an-ngardapiya gurdiya rrawa ana-jerrmarra arrburrwa ngayburrpaa barra wanngu nguburni nipiya An-walkurpa nyanma.

10 Gu-gurdiya ngacha gurrurta gun-gurrima. Ngika minypa gun-gata ngayburrpaa jal nguburni nula Wangarr, wurra jarra minypa nipa jal a-ni arrburrwa ngayburrpaa rrapa an-nigipa Walkur ana-jerrmarra arrburrwa, barra minypa a-juwa arrburrwa rrapa minypa mari a-rrorcha barra arrburrwa, gu-gurda ngacha.

11 Japurra ngapa nyiburr-jirra. Gun-narda minypa Wangarr gurrurta gu-rrimarra arrburrwa burr-guya. Lika ngayburrpaa barra gurrurta ngubi-rrima barra arrburrwa gu-gapa gu-guta.

12 Gala ana-nга a-nacharna a-workiyarna Wangarr, wurra minyja ngayburrpaa gurrurta ngubi-rrimanga arrburrwa gu-gapa gu-guta, gun-narda minypa nipa an-gata Wangarr ngay-

burrpa nguburr-guna, rrapa gurrurta gun-gata minypa nipa gu-rrimanga arrburrwa ngayburrpa ngubi-rrimanga warrpam.[◊]

13 Rrapa ngayburrpa marn.gi nipa an-gata Wangarr ngayburrpa nguburr-guna rrapa ngayburrpa nguburr-guna nipa an-gata Wangarr, ngardawa nipiya arr-wuna nipa An-mawunga, gu-gurda ngacha.

14 Rrapa minypa ngayburrpa nyiburr-guna nyiburr-mipila nyibu-buna, ngayburrpa lika nyibu-ngurrjinga nyiburr-workiya gun-gata minypa Wangarr ana-jerrmarra an-nigipa Walkur nipa An-walkurpa ana-nyala barra wanngu arr-nega arr-gurdiya gorlk.

15 Rrapa ana-nга minypа a-weya Jesus nipa Wangarr an-nika An-walkurpa, nipa an-gata an-gugaliya ngardawa Wangarr an-nika nipa rrapa Wangarr gipa gu-ngardapa abirri-negiyana.

16 Gun-narda minypa ngayburrpa nguburr-jaranga marn.gi rrapa marr nguburr-balcharra nula Wangarr minypa nipa gurrurta gu-rrimanga arrburrwa.

Wangarr nipa gurrurta an-gurrimapa. Rrapa ana-nга an-gugaliya gurrurta gu-rrimangapa an-nirra a-workiya, an-gata an-gugaliya nipa Wangarr, rrapa Wangarr nipa an-gata an-gugaliya.

17 Ngayburrpa gurrurta warrpam ngubirrimangapa arrburrwa gu-gapa gu-guta nipa Wangarr nyanma, barra minypa nuwurra waypa burr-mari a-wengga, ngayburrpa jarra nguburmolamola nguburr-ni barra nula ngardawa gun-

[◊] 4:12 Jon 1:18

guna rrawa mu-ngoyurra nguburr-ni nguburr-molamola minypa nipa Christ.

¹⁸ Ngardawa ana-nga minypa gurrurta gu-rrimanga, an-gata an-gugaliya gun-gugurkuja an-nyagara. Wurra gurrurta gun-molamola warrpam, gun-narda jarra gona gu-yerrnyingga nula. Ngardawa gun-gugurkuja, nipa mari nula, rrappa ana-nga minypa a-gurkujarra, an-gata an-gugaliya ngardawa gala gurrurta gun-molamola warrpam gu-rrima.

¹⁹ Ngayburrpa gurrurta ngubi-rrimanga ngardawa minypa ni-gugu Wangarr gurrurta gu-rrimarra arrburrwa ngayburrpa.

²⁰ Wurra minyja ana-nga a-wengga jimarna nipa jal a-nirra nula Wangarr, wurra wurpa an-nigipa an-borrmunga an-guyinda ngoyurra a-yerryerrmiya nula, gun-narda minypa an-gata an-gugaliya a-yolkiya a-weya, ngarla. Ngardawa minypa an-nigipa an-borrmunga an-guyinda an-gata minypa abirri-nachichiya abirri-workiya nipa ana-guna gala jal a-ni nula, gun-narda minypa gala a-yinmiya jal a-ni nula Wangarr an-gata gala a-nacharna a-workiyarna nipa an-gugaliya ana-nyala.

²¹ Wurra joborr Christ arr-wuna gun-gunaga: Ana-nga minypa jal a-nirra nula Wangarr, nipa an-gata an-gugaliya barra jal a-ni nula an-nigipa an-borrmunga burr-guta.

5

Ngayburrpa Nguburr-molamiyana Wurra Gugurdiya Gu-yika Gu-rrawa Ngika

¹ Aburr-nga aburr-gata minypa marr aburr-balcharra nula Jesus ngardawa nipiya Christ an-gatiya Wangarr a-menga arrburrwa Wanngu An-gunega, aburr-gata ngacha minypa Wangarr burr-yika gu-ngarda yerrcha, rrapa ngayburrpa barra gurrurta ngubi-rrima barra burrwa aburr-gata. Ngardawa ana-nga minypa gurrurta gu-rrimanga nula an-jirrpungapa an-guyinda, an-nigipa delipa rrapa gurrurta gu-rrimanga nula a-workiya.

² Rrapa ngayburrpa marn.gi ngayburrpa gurrurta ngubi-rrimanga burrwa Wangarr burryika gu-ngarda yerrcha minypa gun-gunaga: Minypa jal nguburr-nirra nula nipa Wangarr rrapa gun-nigipa joborr gun-guyinda ngububorrwuja nula nguburr-bamburda.

³ Rrapa ngayburrpa jal nguburr-nirra nula Wangarr minypa gun-gunaga: Minypa gun-nigipa joborr gun-guyinda ngububorrwuja nula nguburr-bamburda. Rrapa gun-nigipa joborr gun-guyinda gun-narda gun-derta gun-gorla arrburrwa ngika.[◊]

⁴ Wurra jarra nguburr-nga nguburr-gata ngayburrpa minypa Wangarr nguburr-yika gu-ngarda yerrcha, ngayburrpa gipa nguburr-molamiyana; gu-gurdiya gu-yika gu-rrawa gala mola gu-yinmiya wana gu-negiya arrburrwa, wurra gun-nyagara. Minyjiya. Ngayburrpa nguburr-molamiyana minypa gun-gunaga: Minypa marr nguburr-balcha nula Jesus, gu-gurda ngacha.

⁵ Ya? Minypa gu-gurdiya gu-yika gu-rrawa

[◊] 5:3 Jon 14:15

a-rrimanga gu-nirra, ana-nga an-gugaliya a-molamiya a-workiya? Wurra gala ana-nga rrapa a-yinmiya, wurra minyja marr a-balcha nula Jesus ngardawa nipiya Wangarr an-nika An-walkurpa, gu-gurdiya ngacha.

Wangarr An-mawunga Rrapa Bugula Rrapa Maningan

⁶ Jesus Christ, nipa an-nardiya a-bena arrbur-rwa minypa burr-bugula burr-maningan. Burr-bugula minypa a-yinagatiya ana-werranga bama a-gurragaja, rrapa burr-maningan minypa a-yinmiyana nipa a-juwuna. A-yinagata a-bena arrbur-rwa: Burr-bugula ngardapa ngika, wurra burr-maningan burr-guta. Rrapa Wangarr An-mawunga nipiya a-ngurrjinga arrbur-rwa a-workiya Jesus Christ, ngardawa minypa Wangarr An-mawunga nipiya gun-burral an-gurrimapa.

⁷ Minypa aburr-gurdiya abirri-jirrapa rrapa an-ngardapa abu-ngurrjinga Jesus Christ:

⁸ Minypa Wangarr An-mawunga rrapa bugula rrapa maningan. Minypa gun-gata gun-ganawa burrwa janguny birripa abirri-jirrapa aburr-ngardapa abu-ngurrjinga.

⁹ Minyja bubu-borrwa: Ngayburrpa gu-galiya yellcha marr nguburr-balcharra arrbur-rwa nguburr-workiya janguny, wurra gun-gata minypa Wangarr a-wena janguny, gun-narda jarra wana gu-jirra. Ngardawa nipiya Wangarr a-wena rrapa a-ngurrjinga an-nigipa An-walkurpa.

¹⁰ Rrapa ana-nga minypa marr a-balcharra nula Jesus ngardawa nipiya Wangarr an-nika

Walkur, gun-narda janguny nipa an-gata an-gugaliya a-galiyarra a-workiya wuparnana. Wurra an-nerranga ana-nga gala marr a-balcha nula Wangarr, an-gata an-gugaliya nipiya ananyaala minypa an-guyolkiya a-nenga Wangarr, ngardawa gala marr a-balcha nula nipa a-ngurrjinga an-nigipa An-walkurpa.

¹¹ Minypa janguny gun-gunaga: Wangarr arr-wuna wanngu gun-guni, rrapa gun-narda wanngu gun-guni ngardawa nipa nyanma An-walkurpa.[◊]

¹² Ana-nga an-gugaliya a-rrimanga Wangarr an-nika An-walkurpa, an-gata an-gugaliya gu-rrimanga a-nirra wanngu gun-guni. Wurra an-nerranga ana-nga gala a-rrima Wangarr an-nika An-walkurpa, an-gata an-nyagara; gala wanngu gun-guni gu-rrima.

Wanngu Gun-guni

¹³ Gun-narda janguny mu-guna mu-jurra ngaypa ngu-wukurrjinga ana-gorrburrwa barra ana-goyburrpa marn.gi nyiburr-ni gun-gata nula minypa ana-goyburrpa nyibi-rrimanga wanngu gun-guni — nyiburr-ganarda minypa marr nyiburr-balcharra nula Wangarr an-nika An-walkurpa.

¹⁴ Rrapa minypa ngayburrpa wolawola Wangarr yi-gurrepa nguburr-negiya nula nguburr-workiya, ngayburrpa marn.gi minypa gun-gunaga: Gun-nga gun-gata ngubu-wengganacha nguburr-workiya gun-nigipa jal gun-guni, nipa Wangarr a-galiyarra arrburrwa a-workiya.

[◊] **5:11** Jon 3:36

15 Rrapa minypa ngayburrpa marn.gi nipa a-galiyarra arrburrwa gun-nga minypa ngubuwengganacha nguburr-workiya, ngayburrpa marn.gi minypa ngubu-wengganachapa lika ngubi-rrimanga.

16 Minyja ny-yinga ny-jata nyi-na an-borrmunga werra a-negiya a-workiya ngoyurra gun-mirdi gun-gujuwa ngika, wurra Wangarr ny-yenggana barra nula, lika nipa a-wu barra wanngu gun-guni. Gun-narda ngu-wena an-gata nula minypa werra a-negiya a-workiya ngoyurra gun-mirdi gun-gujuwa ngika. Wurra gun-nerranga gun-nerra nipa jarra gun-gujuwa; gun-gata nula gala ngu-weyarna jimarna Wangarr ny-yenggana.

17 Minyja gun-nga burr-guta minypa werra nguburr-negiya nguburr-workiya, gu-gurda ngacha gun-nerra, wurpa lika gun-nerranga gun-gata ngoyurra gun-mirdi gun-gujuwa ngika.

18 Ngayburrpa marn.gi minypa gala ana-nga Wangarr an-nika an-gungarda mu-nguy werra a-negiyapa a-workiya. Ngika. Wurra Wangarr an-nika An-walkurpa nipa jarra a-jarlapurda aganya an-gata an-gugaliya, rraka walkwalk an-gata gun-nerra an-gurrimapa gala a-yinmiya arrima, wurra gun-nyagara.

19 Ngayburrpa marn.gi minypa ngayburrpa Wangarr nguburr-yika gu-ngarda yellcha, rrapa minypa gun-nardiya rrawa nipa walkwalk gu-rrimanga a-nirra, an-gata gun-nerra an-gurrimapa.

20 Rrapa ngayburrpa marn.gi nula Wangarr an-nika An-walkurpa, minypa nipa ana-bona

rrapa arr-wuna marn.gi gun-guni, barra minypa an-gata an-burrall Wangarr ngayburrpa marn.gi nguburr-ni nula. Lika ngayburrpa nguburr-guna nipa an-gata an-burrall Wangarr, minypa ngayburrpa nguburr-guna nipa an-gata an-nigipa Walkur Jesus Christ — an-nardiya an-burrall Wangarr, rrapa gun-nardiya minypa wanngu gun-guni.

²¹ Japurra ngapa nyiburr-jirra. Nyiburr-gurdiya nyiburr-ngaypa gu-ngarda yellcha, buburr-jarlapiya nula an-guripa an-guyinda wangarr.

**Nyanyapa Arrku Gun-nika Gun-molamola
Janguny: Minypa Jesus Christ Guna-ganya
Arrburrrwa Gun-geka Rum
The New Testament and portions of the Old
Testament in the Burarra language of coastal
Arnhem Land in Northern Australia**

copyright © 2008-2023 Wycliffe Bible Translators

Language: Burarra

NT: 2008; OT portions: 2023

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-03-04

PDF generated using Haiola and XeLaTeX on 18 Apr 2025 from source files dated 4 Mar 2025

e28712b2-3431-5427-8d73-6a9d1c9e704f